

司徒夾帶拍片 教人搬龍門

「喺戶外企定唔係定點，而喺室內行嚟行去都唔係流動。如果一個有流動的室內，例如哈爾移動城堡，究竟係流動定係定點呢？」

這條問題，無論王維基和何沛謙都應該唔識答。但網絡紅人司徒夾帶就在網上提出這個問題，並拍成《特別的搬龍門技巧》短片（見圖），教人如何搬龍門。短片昨日上載短短數小時，就引來超過六千點擊。

他說搬龍門共有三大技巧，包括可以隨時減少龍門數目、移動龍門位置和隨時請外判旁證，就如四哥在《少林足球》所言：「球證、旁證、足協、足總，全部都係我嘅人，點同我打？」而客串旁證一角的，正是前路茫茫、考慮移民台灣的港視藝員艾威。

他還說，要搬龍門其實並不難，當對方講承諾的時候，你就同佢講法律；當他要講法律，就同佢講原則；人哋講原則，你就講技術；到佢講技術，你就同佢講道德。司徒夾帶話，門常開係包裝，門常搬才是核心價值，這個搬龍門終極心法，你學曉未？